

**Seni Preseten
Henry B. Eyring**

Aewin Chon Aninis
non ewe Aewin Presetensi



Famini me Chiechi Feinfeino

Ia chok ka nonnnom ia, a wor chienom kana ra kutta ewe pwapwa mi nap ka weri seni om manaueni ewe kapas allim a niwinsefan an Jises Kraist. Mi tufich pwe resap tongeni awewe ena pwapwa non kapas, nge ra tongeni esinna nupwen ra kuna non manauom. Repwe fen mochen sinei popunapen ena pwapwa, akkaewin nupwen ra kuna pwe en mi tori osukosuk usun chok ir.

Ka mefi pwapwa nupwen ka apwonueta ekkewe annukun Kot. Ina ewe uwan ira mi pwon ngenikich ren ach manaueni ewe kapas allim. (nenengeni Mo-saia 2:41) Kesap apwonueta ekkewe annukun Kot non nuku ren aramas ar repwe chok katon en, nge ekkewe aramas ra kuna om pwapwa ra ammonata me ren ewe Samon pwe repwe ausening ngeni ewe poraus mi murinno usun ewe Niwisefaniton ewe kapas allim.

Ekkewe feioch ka angei ra awora ngonuk wis me tufich mi amwarar fan itom. Ren en emon chon kunon Jises Kraist mi pwon, a wor wisom om kopwene atoura ngeni ekkewe ekkoch ewe tufich ne kutta pwapwa, akkaewin ngeni cheinom kewe me chon om we famini.

Ewe Samon a kuna om we tufich me a awewe wisom ren ei annuk: A ina wisan iteitani mwan mi mi angei an aurour epwe auroura chon nonnom unukun (nengeni D&C 88:81).

Ewe Samon a amecheresi om kopwe apwonueta ena annuk me ren ewe ekkisiwini a fis non netipom nupwen ka etiwa me manaueni ewe kapas allimen Jises Kraist. Iwe ren ena, a esenipato om tong ngeni ekkewe ekkoch epwe napeno, pwan usun chok om mochen ar repwe angei ena pwapwa ka mefi.

Eu awewen ena siwin a pwa ren ifa usun ka etiwa ewe tufichin aninis non an ewe Samon angangen misineri. Misineri ra kaeo pwe nupwen ra tingor aninisin kutta aramas seni emon ennetin chon nuku epwe fen pwapwa ne ngenir. Ekkewe ra keran papatais ra wesan mochen pwe chiener me chon ar famini repwe fitir non ar pwapwa.

Nupwen om souemwenin angangen misineri non om wart are ekkewe misineri ra tingor itan ekkoch aramas ra tongeni afanafan ngeni, epwe fakkun murrino ngonuk. Ra sinei pwe chienom kana ra fen kuna omw pwapwa, iei minne, ekkana chiechi ra fen monnata ne ausening ngeni me etiwa ewe kapas allim. Iwe mei wor ar nuku pwe en kepwe ewe sokkun chiechi mi namwot ngenir ren ar tonong non ewe muu.

Kesap niuokus pwe chienom kewe repwe pout senuk ren om ka tingorei ekkewe misineri ar repwe churir. Mi wor chienei kewe ra poponi ekkewe misineri nge fan chommong ier ra fen kinisou ngeniei ren ai

achochoch ne atoura ngenir eu mettoch mi fakkun auchea ngeniei. Ka tongeni mina ar repwe chienom feinfeino ren om ka atoura ngenir ewe kapas allim, pun ra fen kuna pwe a fen awora ngonuk pwapwa. Kesap mut ngeni eu tufich an epwe pout senuk om kopwe etiwa emon chienom akkaewin emonchon om famini ar repwe fini ne apwonueta ewe kokkotun pwapwa.

Ese wor pwan eu tufichin wau kapasen etiwitiw nap seni me non ekkewe tempel an ewe Mwichafen. Ikewe ia ewe Samon a tongeni awora ekkewe angangen amanaun ngeni ach kewe neuo rese tufichin angei me non manauer. Ra nennetiwwom ren tong me apinukunuk. Ewe Samon a pwon pwe epwe wor ar tufichin tonong non Muun we (nenengeni D&C 137:7–8), iwe A fotukatiw eu tong fan iter me non netipom.

Chommong me neimi oua mepi pwapwa non ami awora ekkewe angangen ewe tempel, usun chok nupwen ka ngeni ekkewe misineri itan ekkoch aramas ar repwe churi. Ka fen mepi ewe pwapwa mi nap ren om ka fori ekkewe angang fan itan om kewe neuo. A pwa ngeni ewe Soufos Joseph Smith pwe ach pwapwa ese much mi chok tufich ika pwe sipwe awora ewe an ngeni ena feioch fan itan ach kewe neuo me ren ekkewe angangen ewe tempel fan itan ekkewe ra fen mano. (nenengeni D&C 128:18).

Fansoun Christmas a kunnu netipach ngeni ewe Samon pwan ewe pwapwa An we kapas allim a fen wato rech. Sia pwarata ach kinisou ngeni I non ach awora ena pwapwa ngeni ekkoch. Ach kinisou epwe winiti pwapwa ren ach awora itan aramas ngeni ekkewe misineri pwan ren ach uwei itan ach kewe neuo ngeni ewe tempel. Ena pisekin pwaratan ach kinisou epwe etufichi chiechiach me ach famini ar repwe nonnom feinfeino.

AFANAFAN SENI EI POROUS

Preseten Eyring a awewe pwe kich mi tongeni pwari ach kinisou ren ewe Samon ren ach sipwe aporaus ewe kapas allim ren ekkoch. Ka tongeni fos ren ekkewe ka afanafana ifa usun ewe kapas allim mi efeiochu manauer. Ekieki om kopwe peseni ngenir ar repwe esinna me ren iotek ion ra mochen atoura ngenir nifangen ewe kapas allim pwan ifa usun ar repwe fori.

SEMIRIT

Apasa om Kapasen Pwäratä.

Ka tongeni atoura niffangen ewe kapas allim non Kei fansoun Christmas ren om ngeni emon chienom ikachon unukum echo Puken Mormon mi fen mak om kapasen pwarata me non. Fori ekkei mettoch fan pwe kopwe ammonata:

1. Won echo taropwe, aukuku napanapen egat pwor mi ukukun 4½ x 6½ inches (11½ x 16½ cm) me tingorei emon mi watte epwe anisuk ne fichi.
2. Kapachenong echo sasingum — ka tongeni chugani are fichi sasingum— asan ewe taropwe.
3. Makketiw om kapasen pwarata fan sasingum.
4. Tingorei emon mi watte an epwe anisuk ne kapachenong ewe taropwe non ewe Puken Mormon.

SERAFO

Ngang mi Tongeni Ngeni Emon Echo Puken Mormon?

Seni Josh Arnett

Non ai we aewin ierin high school, nei we sensen seminari a tungoreikem am aupwe ngeni chienem kewe rese mochon ewe mwichafen ekkoch Puken Mormon. Ina mo ika pwe ngang mi mefan, ngang mi chok tipeu ngeni an na tungor.

A fen fitu ran ra no me mwen ua tufichin apocho-kunaei ne fori, nge ngang mi ngeni chienei we itan Britany echo Puken Mormon fansoun am mongon neanowas ua pwan ekkis apasa ai kapasen pwarata. Britny a apasa an kinisou fan itan ewe puk.

Neseoponon ewe ierin sukun, Britny a feino ekkis, nge am mi chok foffos fengen. A aporaus ngeniei usun an na sukun minafo, pwan usun chienan kewe ir meinisinchon ewe Mwichafen.

Mi siwin ena me mwen ua no misineri. Ua angei echo taropwe seni Britny a era a wor watte poraus fan itei: I epwene paptais, a pwan mochen pwarata an kinisou ngeniei ren ai chiechioch ngeni pwan ai fori eu nenien appiru mi murrino.

Kot a angei emon mi mefan a chok 15 ierin ese wor an sinei usun angangen misineri, iwe a emweni an epwe aporaus a ewe kapas allim ngeni emon A fen sinei epwe etiwa. Ua sinei pwe seni ach ausesning ngeni ewe Ngun mi Fel, sia tongeni kuna chommong aramas neich ra witiwit ar repwe kaeo usun ewe kapas allim mi niwinsefan. Ua sinei ika pwe sipwe tongeni uwei emon chok ngeni ewe Samon, epwe ifa aukukun [ach] pwapwa ren I non ewe muun [Semach]! (nengeniD&C 18:15).

Ewe chon mak mi nonnom Washington, USA.

© 2013 seni Intellectual Reserve, Inc. Meininis pung mi kawor. A för non Amerika. Kapungunon non fosun Merika: 6/13. Kapungunon chiakun: 6/13. Chiakun *First Presidency Message, December 2013*. Chuukese. 10672 901



Ewe Angang mi Pin an Jises Kraist: Ewe Nau mi Anaemon

Anneaochu me ikiotek usun ekkei mettoch me kutta met kopwe aporaus. Ifa usun om weweiti usun manauan me angangen ewe Chon Amanau epwe tongeni anapano om nuku non I me efeiochu ekkewe aramas ka kan tumunu non om angangen an fefin chon amwa? Ren pwan ekkis poraus, kopwe nengeni reliefsociety.lds.org.

Nuku, Famini, Aninis

I ei eu kinikin non fitu seni Poraus seni An Fefin Chon Amwa mi porausen kinikinin angangen ewe Chon Amanau.

Ach Chon Amanau, Jises Kraist, a iteni ewe Nau mi Anaemon pun I chok ewe emon a uputiw seni emon in mi tongeni mano me emon Sam ese tongeni mano. A angei pochokun mi pin seni Kot, Seman we. Seni inan we, Mary, A angei an tufichin mano, mi tongeni echik, kaka, pekus, metek, me mano.¹

Pokiten Jises Kraist I noun ewe Sam we Anaemon, A tufichin watiw Manauan pwan angeisefanni. Ekkewe pukfel ra aitikich pwe me ren ewe achasefanin Kraist, sia angei manausefan (nengeni Jacob 4:11). Sia pwan kaeo pwe meinisin repwe feita non manau ese much ika pwe sipwe nuku (nengeni D&C 29:43).

Nupwen sia wewechu met wewen pwe Jises I Noun Semach we Anaemon, ach nuku non Kraist epwe napano. Elter D. Todd Christofferson seni ewe Mwichen Ekkewe Engon me Ruemon Aposel

a apasa, “Nuku non Jises Kraist ina ewe pochokunen me pungupungen (1) An I ewe Noun Kot we Anaemon, (2) an Achasefan ese much, me (3) an wesewesen Manausefan.² Soufosun ikenai ra pwarata: “[Jises Kraist] I . . . ewe Nau mi Anaemon non ewe futuk, ewe Chon Amanauen fonufan.”³

Seni ekkewe Pukfel

John 3:16; Doctrine and Covenants 20:21–24 Moses 5:6–9

Seni Ach Uruo

Non ewe Testamen Sofo sia annea usun fefin, mi wor iter pwan ekkoch ese wor iter, ra pwarata nuku non Jises Kraist, kaeo me manaueni An afanafan, me pwarata usun An afanafan fetan, fori manaman, me ningan. Ekkei fefin ra winiti chon kuno mi murrino me chon pwarata mi auchea non ewe angangen amanau.

Ren awewe, Martha a kapasen pwarata mi pochokun usun pinin ewe Chon Amanau nupwen a apasa

nengeni I, “Ua nuku pwe en ewe Mesiah, ewe Noun Kot, ewe epwe feito won fonufan” John 11:27

Ekkoch ekkewe akkaewin chon pwaratan pinin ewe Chon Amanau, ir Inan we, Mary, me tetenin pwin Elisabeth. Ekkis chok mwirin Gabriel a churi Mary, a pwan churi Elisabeth. Fansoun chok Elisabeth a rongorong an Mary kawpong, a “uren ewe Ngun mi Fel” (Luke 1:41) a pwan kapasen pwarata pwe Mary epwe winiti inan ewe Noun Kot.

ESINESIN

1. Nengeni *Gospel Principles* (2009), 52–53.
2. D. Todd Christofferson, “Building Faith in Christ,” *Liahona*, Sept. 2012, 13.
3. “The Living Christ: The Testimony of the Apostles,” *Liahona*, Apr. 2000, 2–3.

Met Ua Tongeni Fori?

1. Pwata mi auchea pwe upwe weweiti wisan Jises Kraist?
2. Ifa usun ach nuku mi tongeni napeno nupwen sia apwonueta ach kewe pwon mi pin?